



Հ Ա Ն Գ Ի Ս Տ

ԱՐԺԱՆԱՊԱՏԻՎ Տ. ԲԱԳԱՐԱՏ ԱՎԱԳ ԶԱՀԱՆԱ ԴԱՎԹՅԱՆԻ
(1890—1963)

Ապրիլի 20-ին, Մադրաս քաղաքում, ի Տեր հանգյալ ծխատեր արժանապատիվ Տ. Բագարատ ավագ քահանա Դավթյանը:

Հանգուցյալը ծնվել էր 1890 թվականին Նոր-Ջուղայում: Նախնական իր կրթությունն ստացել էր տեղի ազգային կենտրոնական վարժարանում և այնուհետև ընտրել էր ազգային ծառայության ճանապարհը, որպես պաշտոնյա և Նոր-Ջուղայի Մեյդանի թաղի Ս. Աստվածածին եկեղեցու վարչության անդամ:

1937 թվականին, Նոր-Ջուղայի Ս. Ամենափրկիչ վանքում, հետևելով մեկ տարի եկեղեցական և կրոնական ուսմանը, դպրեվանքի տեսուչ Տ. Թեոդորոս ծայրագույն վարդապետի ձեռքի տակ, Թավրիզում քահանա է ձեռնադրվել Հանգուցյալ Տ. Ներսես արքեպիսկոպոս Մելիք-Թանգյանի ձեռքով:

Այնուհետև արժանապատիվ Տ. Բագարատ քահանան հովվական պաշտոններ է վարել

Նոր-Ջուղա, Դաքքա (Արևելյան Պակիստան), Մադրաս և Կալկաթա քաղաքներում: Հանգուցյալն իր բարվոք ծառայության համար վարձատրվել է ծաղկյա փլուրնով և քահանայական լանջախաչ կրելու իրավունքով, Վազգեն Վեհափառ Հայրապետի կողմից, 1955 թվականին:

Հանգուցյալի վերջին օծումը կատարել է և թաղմանական արարողությանը նախագահել Կալկաթայի հոգևոր հովիվ հոգեշնորհ Տ. Դավթ վարդապետ Սահակյանը, 1963 թվականի ապրիլի 20-ին: Հանգուցյալի աճյունը ամփոփվել է Մադրասի հայոց դերեզմանատանը:

Տ. Բագարատ քահանա Դավթյանը հավատավոր, գիտակից և պարտաճանաչ հոգևորական էր և իր լավագույն ուժերը նվիրել էր հեռավոր ափերի վրա նետված հայ ժողովրդի թանկագին բեկորների հոգևոր և ազգային դաստիարակության սուրբ գործին:

Հանգիստ նրա ոսկորներին:

